

यूहन्नाए

छीनीकाव ओसरो चिथी

आव चिथी येसुए उसिस यूहन्नाए ओसरो ज़। आल नेब्लो मिंनी नियेन सरैःसिउ लिज़्या। तोबो गायस यादोज़्यावए ओयेन ओसत ल्यो, उयुं य़ालो रैःज़्या (३ यूहन्ना १-६)। फरी तोबो दियोत्रिफस यादोज़्यावए ओयेन ते ओसत माल्यो, स०व रैःज़्या (६-१०)।

१ डा इताव सेर्द लिज़्याव लोम्बा यूहन्नाए ल्योनी नँ डायुंलाव गायस-लाई आव चिथी परीद डाईज़्या। डा नँलाई साचो मया डादीज़्या।

नँलाई रैःद ड़ासुनी च्याँःसिउ ज़
लिज़्या

२ ड़ायुंलाव ड़ानैँ, परमेस्वरए ल्योदा किताव नयुं चाव उलिज़्याव, हिताव ज़ नक्यारँ गराँव ओताक, प्राईनी ज़ धोल पोगोल ओजैनिउक लिद परमेस्वरलाई पोंखारिउ ज़ ड़ानैँज़्या। ३ दाज्यु भाइर ननी याहुक परमेस्वरए ओपाँत नँ थ०रिद सतस

नदोज़्याव ड़ाथैक बनै खुसी ड़ाताके। ४ परमेस्वरए ओपाँताव ड़ाराजमैँव नँ स्यासो ड़ाज़ार परमेस्वरए ओपाँत याबाज़्याव ड़ाथैक ड़ासुनी च्याँःसिउ ज़ लिज़्या।

५ नँ ड़ायुंलाव ड़ानैँ, य़ायुं हुबोरालाई नरासमारिक युं हुबो येन नदोज़्या। परमेस्वरए ओपाँताव आदा होदा बारिज़्याव मासरेस्सिउराए ज़ूनी नदोज़्याव येन भन ज़ चाव लिज़्या। ६ नोराए मन्दलीए ओड़ाक नमिन हाइद 'चाव येन दोज़्याव' लिद गोहाई एज़्यार। निताव आदा होदा बारिज़्यावरालाई परमेस्वरए

ओपैज्याव मिताव माथैव मायो-वल सयो-दद्याद येमत चावस नरापरीकिन ताखेहो है डालिज्या। ७निताव मिँराए यायुँ माहुबोरास काता ज़ मानिद ख्रीसए उमिन सथैन्याए जूँनी आदा होदा लिज्यार। ८है जैद गे नितावरालाई चिऊव ज़ परिज्या। हो ताकिन ची गे ब नोरास साचो पाँ सथैन्यात सिप ज़ गेताज्या।

घेप्पा जैसिउ पैज्याव दियोत्रिफस

६आवकिन ड़ादा नडाव मन्दलीलाई तोबो चिथी परींद डायो। खाली जेडैताव जैसिउ पैज्याव दियोत्रिफसए डापाँ माभैःके। १०डा जेल्योक हुव डादैकिन नोए ओयेन भरी प्राइँराए ड़ाक सतैदयान्या डाले। नोए माचाव पाँर गेडैत भाःदयासिज्याव। ओल भन निताव येनत उयुँ सोन्तोको माताद, ओल ब छुत-रालाई माराचिऊव, चिऊज्यावरालाई ब चिऊव मारायो। भन निताव चिऊज्याव मिँलाई मन्दलीनी ब पले-ज्याव।

चाव येन दाज्याव देमेत्रियस

११नँ डायुँलाव डानैँ, निताव माचाव येन मादाद, नदोज्याव मिताव चाव येन दाव ज़ नैव ताके। चाव येन दाज्याव मिँ परमेस्वरनिकाव ज़ ताज्या। माचाव येन दाज्यावए ते परमेस्वरलाई ब मारँःव। १२देमेत्रियसए उजूँनी ते प्राइँए ज़ चाव वाज़ पाँज्यार, सोनो साचो पाँत उलिज्याव ओक्याँनी ब रैँःज्या। गे ब नो मिँलाई चाव ज़ थ-रैद होए उजूँनी गेपाँज्या। गे गेपाँ साचो ज़ लिज्या लिन्या नँ ब नसैँज्या।

तुपैन्या पाँर

१३नँलाई है दान्या पाँर कुधु ज़ लिज्या। उलिदी ब आव चिथील डामासर। १४बुरू जाँवाक नँस दैसिद गिनडाः गिनडाः जोरैद गिनपाँया है डालिज्या।

१५परमेस्वरए नयुँ होलाँ जैद उईवक। आलाव ननैँराए जेरो है दीज्यार। नलाव प्राइँ डानैँरालाई तोबो तोबोनी जेरो है यादोयो।